

Tañtaña tsghatá lwa Pwal ña 1 Timute

Gazgu

¹ I'i Pwal, ghunatá mnda Yesu Kristi, manda ya mnaf Lazglafta mnda mba amu nda Yesu Kristi ya faf mu ta ghəñ tida ta vinda na delewer na.

² Ña kagha Timute*, vərda zwanja da ma zlg hay nda ñuduf ta vinda yu. Ka vlaghavla Lazglafta ta nzakway ka Da, nda Mghama mu Yesu Kristi ta zđakatahudani, nda tawa hidahidani, nda zđakwani.

Dasuwa ka kuni nda gwal ta taghanatá ghwadaka skwi ta mndu

³ Manda ya si ta mnə yu ña gha ma sli'a da da luwa Mekaduniya ya kay, ka nzata ka ma luwa Afisus, kabga mamu gwal ta tagha tsakalawi ña mnduha. Ka dvanaghata ka ta həñ ña zlanja tañ. ⁴ Ka mnanata ka ta həñ, yaha həñ da laghwi da hamtá ghəñ ma gwada ta prukutunzum, nda mbəda mndəra mndu kul had lu dza'a kdanakta. Ta klaktá hwazlaɓaku, ka zlanja njaku ta kəma ta kəma ma slna Lazglafta ma zlg hay nda ñuduf tsaha ya. ⁵ Klatá ghəña tsa gwada ta mnaghata yu ya ná, tsaya sli'anaftá dvu ya ta sabi ma ñuduf ya nda ghuba, nda vərda ndanu kul had sana dga ghəñ, nda vərda zlg hay nda ñuduf. ⁶ Tsughwadaghu tsughwada sanlaha ta tvi, ka laghwi zadamta ma tsa hwazlaɓakuha dza'a

* **1:2** Ngha ta slna gwal ghunay 16:1.

kwál katanaf́tá hən̄j ya. ⁷ Ta kumay hən̄j ta nzakway ka gwal ta taghanaftá zlahá Lazglafta ta mnduha, ama sna a vərđá hahən̄j ta skwi ta mnə hən̄j wa. Sna a hən̄j ta vərđá skwi ya sladaf hən̄j tida guli wa.

⁸ Nda sna amu kazlay: Dina zlahu kə'a, ka nda tvani ksa mndu ta slna nda tsi. ⁹ Nda sna amu guli kazlay: Fa a lu ta zlahu ka ɲa gwal tđukwa wu kə'a, ama fafa lu ta zlahu ɲa gwal kul sna gwada da mndu, nda gwal ta maga mbrəs, nda gwal ta sidi, nda gwal dmaku, nda gwal kul zləɲa Lazglafta, nda gwal kul snan̄tá dzahay', nda gwal ta pslatá dadaha tan̄j, nda gwal ta pslatá mndu, ¹⁰ nda gwal ta hliri, nda gwal ta hahanaku zgun nda zgun, nda gwal ta dzawaptá mndu ka vu'a, nda gwal tsakalawi, nda gwal ta wada a ta wadu ka bətbət, nda ya ɲa gwal ta maga sanlaha ma ghwadaka skwiha, ka zluɲtá vərđaka tagha skwi. ¹¹ Tsa vərđá tagha skwi ya ná, ta slanaghata ma Lfida Gwada fadim lu ɲa mnay ta ghəɲa glakwa Lazglafta lu.

Rfanaghata Kristi

¹² Ta rfay yu ta Yesu Kristi Mghama mu, ta vlihatá mbraku prək maga slna da. Ta rfay yu ta ghəɲa vəl klaftani ta i'i ka mndu nda ra ɲa faftá ghən̄j tida, ɲa maganatá slna. ¹³ An̄j mndani, nda nza yu ka mndu si ta pgha rutsak tida ghalya, ka mnda giri ɲani, ta balanata, ama ka tawatá Lazglafta ta hidahida ta i'i, kabga ma kwala da kul snan̄ta si ta maga† yu ta tsa skwiha ya. Si had̄ zlghay nda ɲuduf da i'i wa. ¹⁴ Ka zd̄id̄ɲtá Mghama mu ta hud̄i katakata, ka vlihatá zlghay nda ɲuduf, nda d̄vu ya ta mutsu lu ma guyatá vgha

† **1:13** Ngha ta slna gwal ghunay 8:3, 9:4-5.

nda Yesu Kristi. ¹⁵ Wya tsa vərda gwada nda ra ka tsu'afta inda mndu ya: Sasa Yesu Kristi ta ghəŋa hadik ŋa mbanafťá gwal dmaku. I'i mali mataba taŋ. ¹⁶ Tsaya kəl Lazglafta ka tawatá hidahida ta i'i. Kumanċkuma Yesu Kristi ta maravata ma i'i ta nzakway ka mali mataba gwal dmaku ya, ta glakwa ksa ŋudufani. Nda nza ka gray ŋa gwal dza'a zlghaftá tsatsi, ŋa nzakwa taŋ nda rfu ŋa kdekeden. ¹⁷ Ka nza sgit nda glaku ŋa dekdek ŋa Mgham kul had ta mtavata, kul had ta nghavata, tsatsi turtuktuk Lazglafta ŋa kdekeden. Amin!

¹⁸ Timute zwaŋa da, na gwada ta mnaghata yu ná, manda va ya mna la anabi ta gwada ta ghəŋa gha ghalya ya, ŋa nzakwa na gwada na ŋa vlaghatá mbraku, kada laviŋta ka ta vulaftá vərđaka vulu. ¹⁹ Nanaŋa ta zlghay nda ŋudufa gha nda fatá ndana gha kul had sana dga ghəŋ. Vziniŋva sanlaha ta tsa fata ndanu kul had dga ghəŋ ya, ka dzatá zlghay nda ŋudufa taŋ. ²⁰ Mataba tsa mnduha ya na i Himene nda Alegzandra. Vlaŋvla yu ta həŋ ta halaway‡, kada kwala həŋ razəgəltá Lazglafta.

2

Ŋa wa rakwa tsəlbay mu ta tsəlbə na?

¹ Skwi ya vli yu ta mbraku taŋtaŋ ta ghəŋani karaku ná, tsaya dawa skwiha da Lazglafta nda maga du'a, nda taw ma ghuvani, nda rfanaghata ta ghəŋa inda mnduha. ² Dina ka maga du'a ta ghəŋa mghamha nda inda gwal ta ŋanatá ga mgham, kada mutsafta mu ta nzaku lebtekw, ma zdaku, ma zləŋa Lazglafta nda tvani, ŋa nzay mu

‡ **1:20** Gray nda 1 La Kwarent 5:5, 2 Timute 2:17, 2 Timute 4:14.

ta nzaku manda ya ta raku dər ta wati ma tvi tsi. ³ Tsaya skwi dīna ta zdəganatá Lazglafta mnda mba amu. ⁴ Ta kumay tsatsi ta mbafta* inda mndu, ka mutsafta tan̄ ta snaŋtá kahwathwata. ⁵ Na nzakwani ná, turtuktuk Lazglafta. Turtuktuk mndu ta guyanaftá mndu nda Lazglafta guli. Tsa mndu ya ná, Yesu Kristi ya ⁶ ta vlatá ghəŋani ŋa varatá inda mnduha demdem†. Tsaya skwi ya maga tsi ma fitik ya fa Lazglafta. ⁷ Ŋa tsaya kəl lu ka fatá i'i ka mnda mnay, ka mnda ghunay‡ guli. Nda nza yu ka mnda taghanaftá gwal kul nzakway ka la Yahuda§ ta gwada ta zlgħay nda ŋuduf, nda kahwathwata. Tsakalawa da a wu, kahwathwata ta mnə yu.

Imi'aha nda zgwana

⁸ Ta kumay yu tama ta magay zgwana ma inda vli ta du'a nda kapatá dzvu ya nda ghuḅa hezle' nda ta luwa, nda gatá sidi a wu, nda zlərdawi a guli wa.

⁹ Ŋa mi'aha ya guli ná, ka nzakwa hahəŋ nda hba vgha manda ya ta raku. Ma laghu həŋ da rka nda datá ghəŋ ya nda bla. Ma laghu həŋ da rka nda dasu, dər nda mizidikw, dər nda lgut ya nda bla dzvani* a tsi. ¹⁰ Ka rka həŋ ta rka nda ŋərmata slnaha tan̄, manda ya ta ran̄ta mi'aha ta maran̄tá zləŋay tan̄ ta Lazglafta. ¹¹ Ma fitika tagha skwi ya guli, seftekwa ka marakw nzata, nda hanatá ghəŋ. ¹² Vlaŋ a yu ta tvi ta marakw ŋa taghanaftá skwi, dər ŋa ga mgham ta ghəŋa zgun wa. Seftekwa

* **2:4** Gray nda Izekiyel 18:23. † **2:6** Gray nda Mata 20:28.

‡ **2:7** Gray nda 2 Timute 1:11. § **2:7** Gwal kul snaŋtá Lazglafta Da mu ta Luwa. * **2:9** Gray nda 1 Piyer 3:3.

katsi nzata. ¹³ Adamu na tanɗanɗa mndu zlaganap Lazglafta, kada magaftá tsi ta Hawa. ¹⁴ Adamu a nanaf halaway guli wa, marakw ya nanaf tsi, ka kwalaghutá marakw ta snatá gwada Lazglafta†. ¹⁵ Dər má mantsa tsi, dza'a mbanafmba Lazglafta ta marakw nda ma yayni ta zwani, ka gdavagda tsi ta ɗavata ma zlghay nda ɗudufani, nda dɗutá mndu, nda nzaku nda ghuɓa.

3

Gwal ngha Igliz

¹ Nana gwada dza'a yu mnay na ná, gwada ɗa faftá ghəŋ tida ya. Ka dɗafɗa mndu ta slna nzakw ka mali ta ghəŋa Igliz katsi ná, ɗərma skwi ya dɗan tsi. ² Dina ka nzakwa mali ta ghəŋa Igliz, ka mndu kul had rutsak tida, turtuk ka markwani, zlahafzlahá katsi ta ghəŋani, ta ndanay katsi ta ndanu tɗukwa, dɗina ka nzakwani, ta tsu'ay katsi ta matbay ga tan, nda sna katsi ta taghanaftá skwi ta mndu, ³ ma nza tsi ka mndu ta sa ima inabi, ma nza tsi ka mndu ta sidi, ama leɓtekw ka nzakwani. Ma nza tsi ka mndu ta ghazenɗen, ma nza tsi ka mndu dɗutá ta tsemi. ⁴ Nda sna katsi ta ɗanata həgani, nda sna katsi ta zlahá zwanani ɗa nzakwa tan ka zwani ta sna gwada nda hanata ghəŋ guli. ⁵ Ka si sna a mndu ta ɗanata həgani wu katsi, wa kə'a dza'a lavintá nghaftá Igliza Lazglafta na? ⁶ Ma nza tsa mndu ya ka lfida mndu ma zlghay nda ɗuduf, da glə tsi ta ghəŋ, da zləmbamtá tsi ma mndərga tsa guma tsanagha lu ta halaway ya. ⁷ Dina ka nzakwani ka mndu ya ta ghubu dər gwal

† **2:14** Aya 13-14: Ngha ta Zlrafta 2:7, 21-22, 3:1-6.

kul snanṭá Lazglafta, kada nzakwa tsi ka mndu kul had lu ta gagay nda gaga, da zləmbamtá tsi da dəbla halaway*.

Gwal ksa slna ma səla mnduha

⁸ Gwal ta ksa slna ma səla mnduha ya guli, dina ka nzakwa taṅ. Yaha həṅ pgha wirak his ma vu, yaha həṅ nzakway ka gwal ta sasaku, ka gwal ta zba tsemi nda ta ghwadaka tvi. ⁹ Dina ka nzakway taṅ ka gwal ta ṅanatá kahwathwata ya marigin lu ma zlgħay nda ṅuduf nda fata ndanu kul had sana dga ghəṅ. ¹⁰ Dina ka dzəghaṅṭá həṅ karaku. Tahula tsa, ka had sana skwi ṅa mnafta ta həṅ wu katsi, laviṅlava həṅ ta nzakway ka gwal dza'a ksa slna ma səla mnduha. ¹¹ Mantsa ya mi'aha ta ksa slna ma səla mnduha guli. Dina ka nzakwa taṅ. Had wu ka həṅ ta kusleberaku, zlahafzlaha ka həṅ ta ghəṅa taṅ, ka ṅərmani ka həṅ nzakway ma inda skwi. ¹² Mndu ta ksa slna ma səla mnduha ná, turtuk ka markwani, pərdafpərdá katsi ta zlaha zwanani nda gwal ga taṅ tani. ¹³ Ka nda tvani ta ksa gwal ta ksa slna ma səla mnduha ta slna katsi ná, ta vlanṽla lu ta glaku ta həṅ ma inda vli. Laviṅlava həṅ ta gwada taṅ kul had zləṅ ma fatá ghəṅa taṅ ma zlgħay nda ṅuduf ma Yesu Kristi.

Hya skwi ta vlamata zlgħay nda ṅuduf

¹⁴ Ta vindi yu ta na delewer na ṅa gha ná, nda fa ṅudufa da ta labə da nghaghaghata. ¹⁵ Ala, ka gərdugərda yu katsi, dza'a nda sna ka káka dza'a nzaku ma həga Lazglafta ta nzakway ka Igliz, hahəṅ gugudí ta dihanatá kahwathwata. ¹⁶ Manda

* **3:7** Aya 2-7: Gray nda Titus 1:6-9.

va tsaya ná, dagala nzakwa skwi ya nda difa payaf Lazglafta,
 ta nzakway ka Kristi ya zlghaf mu.
 Mariginj mara Lazglafta ka mnda sɛla. Tudúkwa
 nzakwani,
 ka Sulkum nda ghuḅa† marañta.
 Nda ngha duhwalha Lazglafta, ka mnə lu ta
 gwada tida, ɲa inda gwal kul nzakway ka la
 Yahuda.
 Ka zlghaftá mnduha ma inda vli ta ghəɲa hadik.
 Ka klaghatá Lazglafta ta luwa da vla glakwani.

4

Tagha skwa gwal tsakalawi

¹ Tsalinjtsala Sulkum nda ghuḅa kazlay: Ma kdavakta fitik ná, dza'a zlanavazla sanlaha ta zlghay nda ɲudufa tan, ka laghwi da sna ɲa sulkumha ta nana mndu, nda tagha skwi ya ta klagapta ghwadaka sulkumha kə'a. ² ɲa nanaghata gwal ta maga madgwirmadgwir, ta mna tsakalawi, ta həɲ. Vli ma ndana tsa mnduha ya ná, manda datá kufur ghandand ma vu ya nzakwani. ³ Dza'a lmay həɲ ta kla marakw, dza'a lmay həɲ ta zay lu ta sanlaha ma skwa zay. Wya Lazglafta ta zlagiginjá tsa skwiha ya ɲa zay gwal zlghay nda ɲuduf, gwal nda sna ta kahwathwata. Ta zə həɲ ya, ɲa rfay tan ta Lazglafta ta ghəɲani. ⁴ Manda va tsaya, inda skwi zlagiginj Lazglafta ná, dīna* nzakwani. Ka ta rfanagharfa lu ta Lazglafta ta ghəɲa skwi ta zə lu, had sana skwi ɲa wudanaghuta

† **3:16** Gray nda Ruma 1:4. * **4:4** Gray nda Zlrafta 1:31.

wu, ⁵ kabga ghuḅiṅ ghuḅa Lazglafta nda gwadani nda ya nda ma maga du'a guli.

Nzakway ka vərda mnda maganatá slna ta Yesu Kristi

⁶ Ka taghanaftagha ka ta inda tsa skwiha ya ta zwanama katsi, dza'a nzakway ka ka nərma kwalva Yesu Kristi. Dza'a maraṅmara ka kazlay: Nda bagha ka nda gwada zlgħay nda ṅuduf, nda ya nda vərḁaka tagha skwi ya tagħaf ka kə'a. ⁷ Zluṅzla ta gwada prukutunzumha ta gwadə halata mi'aha. Navaṅa kagha, ka nza ka ta nzaku ma ndi'ata vgha gha nda Lazglafta. ⁸ Skwi dina zavzava ṅa hwaya us ma vgha, ama sira a katu mida wa. Ndi'atá vgha nda Lazglafta katək na vərda skwi ta kata mndu ma inda skwi, kabga da tsatsi na ta ta imi ta sləməṅ ta ghəṅ nzaku ya ndanana, nda nzaku ya ta kəma. ⁹ Nana gwada na ná, vərḁa gwada ya, nda ra ka tsu'afta inda mndu kul haḁ sana dzudzukway. ¹⁰ Taghəṅa tsaya ta kəl mu ka dzatá vgha ka ṅavata ka maga slna, kabga nda fa ghəṅa mu ta Lazglafta ya nda hafu mida. Tsatsi ta nzakway ka mnda mba inda mndu, katkatatani gwal zlgħay nda ṅuduf. ¹¹ Tsaya skwi dza'a ka sladanata, ka taghay.

Nzanza ka mndu ṅa ksa sadani

¹² Yaha mndu da hərtətətá nzakwa gha ta ka zwaṅ. Katək ná, nzanza ka ṅa gwal zlgħay nda ṅuduf, ka mndu ṅa kla sadani ma tva gwada, ma tva nzaku, nda ya ma tva nzaku nda ghuḅa. ¹³ Ma kdaku yu ka labə ya, ka gḁata ka ta dzaṅanaftá gwada† Lazglafta ta mnduha, ka vla ka ta mbraku

† 4:13 Ngha ta Lukwa 4:16-21.

ɲa taŋ, ka tagha ka ta skwi ɲa taŋ. ¹⁴ Yaha ka da ganavatá masfa ta skwi ya vlagha Sulkum ma kagha, ya vlagha lu ma fitika mnata la anabi, ka faghaghatá la galata mndu ta dzvu ya. ¹⁵ Ɗafɲa ta vgha ta tsa skwiha ya, ka maga ka nda kɗavakta ɲudufa gha, ɲa nghanɲa inda mnduha káka ta dza'a ta kəma ta kəma. ¹⁶ Dasuwa ka ka nda nzakwa gha, ɗasuwa ka ka nda skwi ta taghə ka guli. Ndi'amndi'a mida. Ma tsa magay gha mantsa ya, dza'a mbanafɲa ka ta ghəɲa gha, nda gwal ta fata sləməɲ ka snay tani.

5

Vla ta hidaku ɲa inda gwal zlgħay nda ɲuduf

¹ Ma davə ka ta glata mndu. Nda ɗasuwa ká ka gwada nda tsi, manda skwi nda da gha*. Manda mna gwada ɲa zwanama gha ka ka gwada nda zwana duhwalha. ² Galata mi'aha ya guli ná, manda mamaha gha, káka ngha həɲ. Ngha ta daghala mi'aha manda kwagha ma gha kul haɗ ndananɲá sana skwi nda həɲ.

Mi'a wadgu

³ Vla ta glaku ɲa vərɗaka mi'aha ka wadgu, ka matuɲulum. ⁴ Ka si mamu zwana tsa wadgu ya, ka zighihani a tsi katsi, tiɲəl hahəɲ dza'a zrafta katanɲá gwal ga taŋ, ɲa planamtá dzva taŋ. Tsaya skwi ta zɗəganatá Lazglafta. ⁵ Tsa vərɗa wadgu ta nzakway ka matuɲulum kul haɗ mndu ɲa katanɲa ya ná, ta Lazglafta fafta tsatsi ta ghəɲani. Haɗ ta zlanɲá maga du'a, ka tawa ghəɲ da Lazglafta nda fitik tani, nda rvidik tani, ɲa ɗawa katu da tsi wa.

* **5:1** Gray nda Levitik 19:32.

⁶ Ama wadgu ya ta nzaku ta daghayakwani ná, nda mta tsaya dər má ta ndiri tsi. ⁷ Tsaya skwi dza'a ka havanaktá hən, kada nzakwa hən kul had rutsak ta hən. ⁸ Ka had mndu ta nghapta ka la tañ, katkatatani la ma həga ga tañ wu katsi, ɔlinɔla tsa mndu ya ta zlgħay nda ɲuduf, mal tsatsi badzatani ka mndu kul zlgħaftá Yesu.

⁹ Marakw ya mtu zə'ala tañ ná, ta magay ka imani ta mku' mbsak, kada mbədamta lu mataba mi'a wadgu. Tsa si turtuktuk yeya ka zə'al snañ tsi guli. ¹⁰ Ta ghubay ka lu ma ɲərma slnahani ta magə tsi. Va galanafgala katsi dīna ta zwani, ta tsu'ay katsi ta matbay ga tañ, ta mbazay katsi ta səla gwal zlgħay nda ɲuduf, ta katay katsi ta gwal ta sa duni, fafa katsi ta ghəñani ka maga inda ɲərma slna. ¹¹ Yaha ka mbədamtá mi'a wadgu ta ka daghali ma tsa mbsak ya, kabga bađu sli'avafta dīva zgun ma vgha tañ, ka dganatá hən nda Kristi ná, zbay tañ ta dza'agəlta da zə'al. ¹² Dza'a ksay guma ta hən kabga ɔlanapɔla hən ta skwi ya si kura hən tañtañ. ¹³ Taghəña tsa guli, had sana skwi ta magə tsi ta ghəña sli'ani da ra watgha həga ga mndu wa. Dza'a ra watgha həga ga mndu yeya a guli wu, dagala va yawa tañ. Gwada kul nghanatá hən ná, tsaghuzlaram ka hən dida. ¹⁴ Tsaya tama, ta kumay yu ta sli'a mi'a wadgu ta ka daghali ya da zə'alha tañ, ka yaya hən ta zwani, ka ngha hən ta həga tañ, kada kwala ghumaha mu ta mna gwada kul raku ta amu. ¹⁵ Mamu sanlaha ta gi ghadata mbədaghutá vgha, ka zluñtá vərda tvi, ka laghwi mista halaway. ¹⁶ Ka mamu sana marakw ta zlgħaftá Yesu, nda mi'a wadgu ma mndəra tañ

katsi, ka kata tsi ta hən, yaha tsi zlanantá Igliz, kada laviŋta Igliz ta katanťá vərđa wadguha ya ta dunluŋwaku.

Gwal ngha Igliz

¹⁷ La galata mndu ta ksa slna đina mataba Igliz ná, đina ka vla glaku dagala ŋa taŋ. Katkatatani gwal ta mna gwada, nda gwal ta tagha skwi ŋa mnduha. ¹⁸ Ka lu vindafta ma gwada Lazglafta na: «Hađ kuni dza'a hbunustá budzaŋ ta wi ta sla ta đga hya wu,» ka'a. Mantsa ya ka'a guli na: «Raŋra vlanťá nisəlani† ta mndu ta ksa slna,» ka'a. ¹⁹ Ma gi tsu'af ka ta gwada ta mnafta lu ta sani ma glata mndu ta ksa slna mataba Igliz. Ba mamu ka masləmtsək tađ his ka hkən a tsi ta snanaghata. ²⁰ Gwal ta ga dmaku ya, dvanaghadvə ta hən ta kəma inda mnduha, kada ganafťa tsi ta zlən ta sanlaha.

²¹ Ta ndəđa dzvu yu ŋa gha ta kəma Lazglafta, nda Yesu Kristi, nda ya ta kəma duhwalhani zabap Lazglafta. Snasna ta tsa gwada ya, yaha ka da laghwı da đva ghən. Yaha ka da gala mndu nda gala. ²² Yaha ka da gi hwaya fanaghatá dzvu ta ghəŋa mndu ŋa vlanťá slna mataba Igliza Lazglafta. Yaha ka da hba huta mista mndu ta gatá dmaku. Ngha ta ghəŋa gha, yaha ka faftá rutsak ta vgha gha.

²³ Yaha ka gđata ta sa imi kwenkwen, ama ka sa ka ki'a ta ima inabi, ŋa ghzla skwi ma huđa gha, nda ya ŋa ghzla tsa gđata ta gđata ka kul đughwanaku ya.

† **5:18** Ngha ta Vrafta ta zlahu 25:4 nda 1 La Kwareŋt 9:9, Mata 10:10, Lukwa 10:7.

²⁴ Sanlaha ma mnduha ná, ta daʔi dmakwa taŋ, dər ta la a lu tsanaghatá guma ta hən. Ama tahula tsanaghatá guma ta hən ta nghavata ɲa sanlaha. ²⁵ Manda va tsaya guli, ta nghaku ɲərma slna ta daʔi, dər má sabə a tsi ta daʔi gi hadahada wu, dífaghuta a wa.

6

La vu'aha

¹ Inda gwal ta ga vu'a, ka vla hən ta glaku ɲa danahəgaha taŋ, kada kwala mnduha ta raza Lazglafta, nda skwiha ya ta taghə mu. ² Ka gwal zlgħay nda ɲuduf na danahəgaha taŋ katsi, yaha hən da kwal kul sna gwada da hən, kabga nzakwa taŋ ka zwanama ma zlgħay nda ɲuduf. Ka ɲavanja hən katək ka maganata slna taŋ nda tvani, kabga tsa danahəgaha taŋ ta maganata hən ta slna ya ná, gwal zlgħay nda ɲuduf ta d̄vu Lazglafta hən.

Ma tseɗi ta saba inda ghwadaka skwi

Tsaya skwiha ɲa taghay gha ɲa mnduha. Ka vla ka ta mbraku ɲa taŋ. ³ Ka lagha mndu ka tagha sana skwi tskəm, ka zluŋtá vərɗaka gwada Mghama mu Yesu Kristi, nda skwi ya ta taghə mu ta ran̄tá zlgħay nda ɲudufa amu katsi, ⁴ tsa mndu ya ná, gla ghən ta glə tsi, haɗ sana skwi snaŋ tsi wa. Dughwana a ma ndanani wa, zlərdutawi nda mbaɗa gwada yeya snaŋ tsi. Ma tsaya ta saba drakuha, nda zlərdutawi, nda razuha, nda ghwadaka uwa'uwalakuha ⁵ nda zlərdutawi kul kɗavakta mataba gwal kul haɗ ghunislak ma ghənja taŋ. Snəgla a hən ta kahwathwata wa. Dina ná, skwi ɲa mutsa gadghəl ya ka hahən ta ndanay.

⁶ Manda va tsaya nzakwani, dina ná, mghama gadghəl ya, ka ta rfu mndu nda kuraghuta skwi ya da tsi. ⁷ Anj mndani, had sana skwi ya klaganam mu da ghəŋa hadik wa. Manda va tsaya guli ná, had sana skwi ya dza'a klinṭa mu guli wa. ⁸ Tsaya tama, ka mamu mu nda skwi ŋa zay, nda skwi ŋa suḍay ta vgha ya ná, prək mu nda tsa. ⁹ Ama gwal ta zba nzaku ka gadghəl ná, ta dədamdəda həŋ da skwi ta dzəgha mndu. Ŋa dədamta taŋ da dəbla ghwadaka mnduha ta badza mndu, nda ya ta zadanatá mndu ŋa dekdek. ¹⁰ Dvutá tsemi ná, ta klakkla ta slrəŋa inda ghwadaka skwi. Ma tsa dvuta taŋ ta tsemi ya, ka zlanavatá həŋ ta zlghay nda ŋuḍufa taŋ, ka garaḅ tsi ta həŋ katakata.

Vərđaka vula zlghay nda ŋuḍuf

¹¹ Ama kagha mnda Lazglafta, wara ta tsa skwiha ya. Ka zba ka ta tva nzaku tdukwa, nda tva ndi'anavatá vgha ta Lazglafta, nda tva zlghay nda ŋuḍuf, nda tva dvutá mndu, nda tva ksa ŋuḍuf, nda tva nzaku leḅtekwa guli. ¹² Lma ta vərđa lma zlghay nda ŋuḍuf. Zak za ta hafu ŋa kdekedzen, kabga hgafhga Lazglafta ta kagha ta ghəŋani ma mnaŋta gha ta ŋərmata zlghay nda ŋuḍufa gha ta kəma ndəghata masləmtsəkha. ¹³ Ka yu ta mnaghata ta kəma Lazglafta ta vla hafu ŋa inda skwi, nda ya ta kəma Yesu Kristi ta mnigintá vərđa gwada ta kəma Pwanəs Pilat* ná, ¹⁴ ka ŋanata ka ta na gwada ta mnaghata yu na. Ka nzata ka kul had sana skwi ta kagha, kul had rutsak, ha ka sagha fitik dza'a kəl Mghama mu Yesu Kristi ka

* **6:13** Ngha ta Yuhwana 18:36-37, 19:11.

maravata. ¹⁵ Dza'a maravamara bađu fitik ya tsaf Lazglafta. Da tsa Lazglafta ya inda mbraku. Tsatsi Lazglafta turtuktuk. Tsatsi dzuɓaya zdaku. Tsatsi ta ga Mgham ta ghəŋa mghamha†. Tsatsi mgham ta malaptá mghamha. ¹⁶ Tsatsi turtukwani kul had ta mtavata, ta nzaku ma tsuwadək kul laviŋtá mndu ta ɓhanavata. Had mndu ta kɗə nghanja wa. Had mndu dza'a laviŋtá nghanja‡ guli wa. Nani glaku, nda mbraku, ŋa kɗekedzeŋ. Amin!

Vlanjá hidaku ta gwal ka gadghəl

¹⁷ Mnanamna ta gwal ka gadghəl ma na ghəŋa hadik na, yaha həŋ da ghərɓaku, yaha həŋ da laghwida faftá ghəŋa taŋ ta gadghəla§ taŋ ya dza'a kwal kul nzɗavata. Ta Lazglafta ya ta vlamatá inda skwi ka haslay ŋa nzakwa mu nda rfu ka həŋ faftá ghəŋa taŋ. ¹⁸ Mnanamna ta həŋ ka maga həŋ ta zdaku. Ka sganaghata həŋ ta maga skwiha dīnadīna. Mnanamna ta həŋ ka muvla həŋ ta muvla, ka vla həŋ ta skwi ŋa katanjá sanlaha nda tsi. ¹⁹ Ka mantsa ya ka həŋ magay, dza'a tskanatska həŋ ma ŋərma vli ta skwiha taŋ, ŋa slafta taŋ tida bađu mahtsim*, kada mutsafta həŋ ta vərɗa hafu.

Dzatá ghəŋa gwada

²⁰ Timute ɗa, dasuwa ka ka ŋanatá skwi ya fagham Lazglafta ma dzvu. Ma fam ka ta wa gha da gwadaha ka bətbət kul gra vgha nda zlghay nda ŋuɗuf, nda tagha skwi ya ta mnə lu kazlay: Snaŋtá skwi kə'a ya, tsaw tsakalawi ya. ²¹ Ma famtá ghəŋ

† **6:15** Gray nda Vrafta ta zlahu 10:17, Zabura 136:3. ‡ **6:16** Gray nda Zabura 104:2, Sabi 33:20, Yuhwana 1:18. § **6:17** Gray nda Lukwa 12:20. * **6:19** Gray nda Mata 6:20.

ka tagha tsa skwiha ya, kəl sanlaha ka Pak zlg hay
nda nɗufuf. Ka nza zɗakatahuda Lazglafta nda
kaghuni!

Deftera Lfida Dzratawi New Testament in Hdi

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Hdi

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 22 Feb 2024 from source files
dated 29 Jan 2022
f257b780-c0dd-5cce-9b20-430484439898